

Polugodišnji bilten

juli - decembar 2025. godine

**MINISTARSTVO SIGURNOSTI BOSNE I HERCEGOVINE
ODSJEK ZA BORBU PROTIV TRGOVINE LJUDIMA**

STATISTIČKI PODACI O ŽRTVAMA TRGOVINE LJUDIMA ZA 2025. GODINU	4
Vijeće Evrope podržalo kampanju podizanja svijesti o trgovini djecom u digitalnom okruženju	4
Evropski dan borbe protiv trgovine ljudima obilježen panel diskusijom o digitalnim rizicima za djecu	5
Unaprijeđeni kapaciteti za finansijske istrage i oduzimanje imovine u predmetima trgovine ljudima	5
Održana obuka trenera o intervjuiranju usmjerenom na žrtvu	6
Dodijeljen grant za certifikaciju stručnjaka za rad s djecom u krivičnim postupcima.....	6
Radionica u okviru Godišnjeg savjetovanja tužilaca – jačanje kapaciteta tužilaca o pravima žrtava trgovine ljudima.....	6
Unaprijeđena regionalna saradnja u borbi protiv trgovine djecom - Ekspertni sastanak o prisilnom prosvjačenju	7
Razvijen i usaglašen Mehanizam za kompenzaciju žrtava trgovine ljudima u BiH.....	7
Studijska posjeta Nizozemskoj – pristup pravdi i kompenzacija žrtava trgovine ljudima.....	8
Podrška preživjelim žrtvama trgovine ljudima kroz direktni grant Vijeća Evrope.....	8
JAČANJE PROAKTIVNE IDENTIFIKACIJE I KOORDINACIJE MOBILNIH IDENTIFIKACIJSKIH TIMOVA	8
REGIONALNO MAPIRANJE USLUGA SKLONIŠTA ZA ŽRTVE TRGOVINE LJUDIMA	9
SPECIJALIZOVANA OBUKA ZA PRUŽAOCE USLUGA ŽRTVAMA TRGOVINE LJUDIMA	9
Redovni koordinacijski sastanci lokalnih koordinatora za borbu protiv trgovine ljudima.....	10
Uvodna obuka o trgovini ljudima.....	10
Ljetna policijska škola – Brčko distrikt BiH.....	10
Akademija radnih migracija i simulacijska obuka za borbu protiv trgovine ljudima.....	10
Simulacija suđenja („mock trial“)	11
Digitalna kampanja podizanja svijesti: „By Us, For Us: Stories That Move“.....	11
Izrada priručnika „Identifikacija žrtava trgovine ljudima u migrantskim tokovima – Priručnik za policijske službenike“.....	11

Migracijski informativni punktovi	12
„Jačanje pristupa pravdi i efikasnim pravnim lijekovima za žrtve trgovine ljudima“.....	12
Aktivnosti Centra za sigurni internet u Bosni i Hercegovini.....	12
Policijske operacije u BiH uz podršku projekta EU4FAST.....	13
Operacija „NID“ – Borba protiv trgovine ljudima u Sarajevu, Istočnom Sarajevu i Zavidovićima.....	13
Operacija „ISTOK SWAT“ – Razbijanje migrantskih kriminalnih mreža u Velikoj Kladaši	13
Održano 18. godišnje Stručno savjetovanje tužilaca u Neumu, BiH.....	14
Regionalna konferencija protiv prisilnog prosjačenja i trgovine ljudima	14
Sastanak Radne grupe Zapadni Balkan (Task Force Western Balkans).....	15
18. OKTOBAR - EVROPSKI DAN BORBE PROTIV TRGOVINE LJUDIMA.....	16
KAMPANJA PODIZANJA SVIJESTI	16
ŠKOLSKE RADIONICE U ZHK I HNK.....	16
PSIHOLOŠKA I SOCIJALNA POMOĆ DJECI ŽRTVAMA	17
OBUKE ZA IZGRADNJU KAPACITETA PREDSTAVNIKA	17
NADLEŽNIH INSTITUCIJA IZ HNK I ZHK	17
MISIJA OSCE-a U BOSNI I HERCEGOVINI.....	17
Sažet prikaz sudske prakse u slučajevima trgovine ljudima.....	17
Simulirano suđenje za studente prava	18
Panel diskusija na Godišnjem savjetovanju tužilaca	18
Omogućavanje međunarodne saradnje.....	18
Kampanja na društvenim mrežama povodom Svjetskog dana borbe protiv trgovine ljudima.....	18
Konferencija za podizanje svijesti i jačanje borbe protiv trgovine ljudima i radne eksploatacije u lancima snabdijevanja.....	19
MISIJA OSCE U BIH: REZULTATI PRAĆENJA PREDMETA TRGOVINE LJUDIMA.....	19

STATISTIČKI PODACI O ŽRTVAMA TRGOVINE LJUDIMA ZA 2025. GODINU

U toku 2025. godine u Bosni i Hercegovini registrovano je ukupno 65 potencijalnih/identifikovanih žrtava trgovine ljudima. Ukupno 44 žrtve su ženskog pola, a 21 žrtva je muškog pola. Ukupno 15 žrtava su punoljetne (9 žrtava muškog pola, 6 žrtava ženskog pola), a 50 žrtava su maloljetne (38 ženskog pola, a 12 muškog pola). Oblici eksploatacije registrovani tokom 2025. godine su bili: 4 prosjačenja, 7 seksualno iskorištavanih, 10 radna eksploatacija, 35 drugih oblika eksploatacije i 9 nepoznatih oblika eksploatacije. Od navedenog broja ukupno 37 žrtava su državljani Bosne i Hercegovine, 28 žrtava su strani državljani od čega su 15 žrtava državljani Hrvatske, 2 žrtve su državljani Slovenije, 2 žrtve su državljani Indije, 2 žrtve su državljani Španije, 1 žrtva je državljanin Belgije, 1 žrtva je državljanin Francuske i za 5 žrtava državljanstvo je nepoznato. U izvještajnom periodu u sigurnim kućama je boravilo 59 žrtava trgovine ljudima.

Što se tiče same identifikacije žrtava od strane vladinih institucija i nevladinih organizacija, statistika je u nastavku:

Vladine institucije su identifikovale 63 žrtve, a to je: 42 žrtve ženskog pola, a 21 muškog pola. Od ovog broja, 14 žrtava je punoljetno (5 ženskog pola), 49 žrtava je maloljetno (37 ženskog pola i 12 muškog pola). Evidentirani su sljedeći oblici eksploatacije: 4 prosjačenja, 10 radna eksploatacija, 6 seksualno i 34 drugi oblik iskorištavanja i 9 nepoznati oblik eksploatacije. Od ovog broja, 37 žrtava su državljani Bosne i Hercegovine.

Nevladine organizacije su identifikovale 2 žrtve, a to su: 2 žrtve ženskog pola (1 žrtva maloljetna, 1 žrtva punoljetna). Evidentirani su sljedeći oblici eksploatacije: 1 seksualni oblik eksploatacije, 1 drugi oblici eksploatacije.

Statistika žrtvi po koordinacionim timovima/agencijama¹: Unsko-sanski kanton – 8 žrtava; Posavski kanton – 0 žrtava; Tuzlanski kanton – 5 žrtava; Zeničko-dobojski kanton – 4 žrtve; Srednjobosanski kanton – 0 žrtava; Bosansko-

¹ Prema dostavljenim podacima.

podrinjski kanton Goražde – 0 žrtava; Hercegovačko-neretvanski kanton – 0 žrtava; Zapadnohercegovački kanton – 0 žrtava; Kanton Sarajevo – 0 žrtava; Kanton 10 – 0 žrtava; Brčko distrikt BiH – 31 žrtva; SIPA (Državna agencija za istrage i zaštitu) – 10 žrtava; Služba za poslove sa strancima – 2 žrtve; Centar za socijalni rad – 3 žrtve.

Vijeće Evrope podržalo kampanju podizanja svijesti o trgovini djecom u digitalnom okruženju

U periodu od aprila do novembra 2025. godine, Vijeće Evrope je kroz direktni grant podržalo MFS-EMMAUS u realizaciji projekta „Kampanja podizanja svijesti o trgovini djecom u digitalnom okruženju“ na području cijele Bosne i Hercegovine. Kampanja je bila usmjerena na informisanje djece, mladih, roditelja, nastavnika i šire javnosti, s posebnim fokusom na žene od 25 do 44 godine i mlade iz rizičnih digitalnih okruženja. Aktivnosti su obuhvatile 40 vizuala distribuiranih putem društvenih mreža, koji su ukupno generisali preko 55.000 pregleda, 11 edukativnih video sadržaja sa više od 3.200 pregleda, četiri epizode podcast serije „Digitalne zamke“ i distribuciju 1.020 promotivnih plakata. Kampanja je informisala o rizicima online trgovine ljudima, uključujući grooming, seksualnu iznudu, lažno zapošljavanje i druge oblike digitalne manipulacije te promovirala nacionalne mehanizme prijavljivanja i podrške. Kroz kombinaciju digitalnih i offline aktivnosti kampanja je ojačala angažman mladih i zajednica u prevenciji trgovine djecom u digitalnom okruženju.



Evropski dan borbe protiv trgovine ljudima obilježen panel-diskusijom o digitalnim rizicima za djecu

Povodom Evropskog dana borbe protiv trgovine ljudima, 18. oktobra 2025. godine u Historijskom muzeju Bosne i Hercegovine u Sarajevu održana je interaktivna panel-diskusija pod nazivom „[Digitalne zamke: Prevencija trgovine ljudima počinje znanjem](#)“. Događaj je organiziran u saradnji Vijeća Evrope, Ministarstva sigurnosti BiH i MFS-EMMAUS-a, a okupio je 24 učesnika iz civilnog društva, omladinskih organizacija, akademske zajednice i nadležnih institucija.

Panel je bio usmjeren na sve izraženije online rizike za djecu, uključujući grooming, seksualnu iznudu (sextortion), obmanjujuće vrbovanje, lažne oglase za posao i zloupotrebu ličnih podataka u digitalnom okruženju. Poseban fokus stavljen je na mehanizme prijavljivanja i zaštite, uključujući Centar za sigurni internet, SOS linije, telefone za pomoć, kao i policijske i institucionalne kanale prijave.

Panel diskusija je doprinijela jačanju svijesti, međusektorske saradnje i aktivnog uključivanja mladih u prevenciju trgovine djecom putem interneta. U okviru kampanje izrađen je i [promotivni video](#), koji je objavljen i promoviran putem online platformi Ureda Vijeća Evrope u Sarajevu, s ciljem osiguravanja dugoročnog efekta i šireg društvenog doseg poruka prevencije.



Unaprijeđeni kapaciteti za finansijske istrage i oduzimanje imovine u predmetima trgovine ljudima

U periodu od maja do decembra 2025. godine, uz konsultantsku podršku Vijeća Evrope, ostvaren je značajan napredak u jačanju finansijskih istraga i mehanizama oduzimanja imovinske koristi u predmetima trgovine ljudima u Bosni i Hercegovini. Kroz konsultantski angažman profesora Eldana Mujanovića, razvijen je Priručnik i multidisciplinarni kurikulum za obuke o finansijskim istragama i zapljeni imovine, zasnovan na procjeni potreba institucija, analizi domaće i regionalne sudske prakse te jačanju međuinstitucionalne saradnje. Izrada dodatnih praktičnih i operativnih materijala za obuku planirana je za 2026. godinu.

U cilju praktične primjene razvijenih znanja, 10. i 11. jula 2025. godine na Jahorini je održana dvodnevna specijalizirana radionica o finansijskim istragama i oduzimanju imovine stečene krivičnim djelima. Radionica je okupila 27 učesnika iz policijskih i sigurnosnih agencija, tužilaštava, poreskih i carinskih organa te nadležnih ministarstava na državnom i entitetskom nivou. Kroz rad na praktičnim studijama slučajeva i regionalnim primjerima, učesnici su unaprijedili kapacitete za identifikaciju, privremeno zamrzavanje i trajnu konfiskaciju imovine, uz poseban fokus na obeštećenje žrtava trgovine ljudima.

Dodatno, u istom periodu izrađen je dokument „Finansijski aspekti trgovine ljudima: opći trendovi, tipologije i indikatori pranja novca“, razvijen na zahtjev praktičara u saradnji sa Tužilaštvom Bosne i Hercegovine i Finansijsko-obavještajnim odjelom SIPA-e (FOO). Dokument predstavlja praktičan alat za tužioce, istražitelje i finansijsko-obavještajne analitičare te doprinosi jačanju institucionalne spremnosti i efikasnijem provođenju finansijskih istraga povezanih s trgovinom ljudima.



Održana obuka trenera o intervjuiranju usmjerenom na žrtvu

Vijeće Evrope je 14. i 15. jula 2025. godine u hotelu HAN na Bjelašnici organizovalo Obuku trenera o intervjuiranju usmjerenom na žrtvu, namijenjenu pružaocima besplatne pravne pomoći, predstavnicima nevladinih organizacija i službenicima za provođenje zakona u Bosni i Hercegovini.

Obuka je okupila tužioce, policijske službenike, socijalne radnike, psihologe i predstavnike civilnog društva, s ciljem jačanja teorijskih znanja i praktičnih vještina za vođenje etičkih, efikasnih i netraumatižirajućih intervjua sa žrtvama trgovine ljudima. Program je realizovan kroz interaktivne sesije, simulacije i simulirano suđenje, uz poseban fokus na trauma-informisani pristup, izgradnju povjerenja i međuinstitucionalnu koordinaciju.

Kao rezultat obuke, 14 stručnjaka u oblasti borbe protiv trgovine ljudima certificirano je kao treneri, osposobljeni za prenošenje stečenih znanja i metodologija unutar svojih institucija i profesionalnih mreža. Time je dodatno unaprijeđen nacionalni kapacitet za zaštitu prava žrtava, kvalitet prikupljenih dokaza i jačanje krivičnog gonjenja.



Dodijeljen grant za certifikaciju stručnjaka za rad s djecom u krivičnim postupcima

U okviru projekta Vijeća Evrope, u periodu od 3. aprila do 30. septembra 2025. godine, dodijeljen je direktni grant Udruženju „Zemlja djece u BiH“ za realizaciju projekta „Certifikacija stručnjaka za rad s djecom u krivičnim postupcima“, u saradnji sa Federalnim ministarstvom pravde.

Kroz tri certificirane obuke održane u Mostaru (od 16. do 18. juna), Bihaću (od 23. do 25. juna) i Zenici (24. i 25. septembar), ukupno je 89 praktičara iz

policije i centara za socijalni rad uspješno osposobljeno i certificirano za rad s djecom u krivičnim postupcima. Obuke su osigurale široku teritorijalnu pokrivenost i doprinijele jačanju multidisciplinarnе saradnje u tri kantona.

Kao rezultat, unaprijeđeni su profesionalni standardi u oblasti dječije osjetljive komunikacije, forenzičkog intervjuisanja i trauma-informisanog pristupa, uz osiguranu dugoročnu održivost kroz primjenu standardiziranih modula, zvaničnu certifikaciju Federalnog ministarstva pravde i angažman ovlaštenih lokalnih trenera.



Radionica u okviru Godišnjeg savjetovanja tužilaca – jačanje kapaciteta tužilaca o pravima žrtava trgovine ljudima

U periodu od 15. do 17. oktobra 2025. godine, u Neumu je održano Godišnje savjetovanje tužilaca, u okviru kojeg je realiziran trodnevni panel i radionica posvećena jačanju odgovora na trgovinu ljudima. Aktivnost je organizirana u saradnji sa CEST-ovima FBiH i RS, Udruženjem tužilaca FBiH, uz podršku partnera iz Misije OSCE-a u BiH i EU4FAST-a.

Radionica je okupila 24 učesnika iz tužilaštava, ministarstava unutrašnjih poslova i pravde, sudova, akademske zajednice, organizacija civilnog društva i međunarodnih organizacija. Fokus je stavljen na ranu identifikaciju žrtava, finansijske istrage, mehanizme kompenzacije, pravne lijekove te jačanje međuinstitucionalne saradnje.

Aktivnost je doprinijela unapređenju stručnih znanja i praksi tužilaca i drugih relevantnih aktera, s ciljem osiguranja djelotvornije zaštite prava žrtava trgovine ljudima i efikasnijeg krivičnopravnog odgovora.



Unaprijeđena regionalna saradnja u borbi protiv trgovine djecom - Ekspertni sastanak o prisilnom prosjačenju

Regionalna saradnja u borbi protiv trgovine ljudima dodatno je ojačana kroz **bilateralni ekspertni sastanak održan u Sarajevu 2. i 3. oktobra**, organiziran u saradnji sa sestrinskim projektom Vijeća Evrope u Srbiji. Sastanak je okupio **17 predstavnika institucija iz Bosne i Hercegovine i Srbije**, uključujući ministarstva unutrašnjih poslova i sigurnosti, sudove, tužilaštva, službe za zaštitu žrtava i socijalnu zaštitu, kao i organizacije civilnog društva.

Tokom sastanka vođena je **detaljna razmjena iskustava o predmetima trgovine djecom u svrhu prisilnog prosjačenja**, s posebnim fokusom na izazove u identifikaciji, krivičnom gonjenju i zaštiti žrtava. Aktivnost je doprinijela **jačanju prekogranične saradnje i unapređenju koordinisanih odgovora** na složene oblike trgovine ljudima u regionu.



Razvijen i usaglašen Mehanizam za kompenzaciju žrtava trgovine ljudima u BiH

U periodu od 19. maja do 9. decembra 2025. godine pružena je stručna podrška izradi i validaciji objedinjenog dokumenta „[-Mehanizam za kompenzaciju žrtava trgovine ljudima u Bosni i Hercegovini Vodič za institucije i organizacije](#)“. Dokument je razvijen u skladu sa decentraliziranom strukturom krivičnog sistema u BiH (državni nivo, Federacija BiH, Republika Srpska i Brčko distrikt BiH) te uključuje ažurirane pravne i institucionalne analize, dobre međunarodne prakse, pristup usmjeren na žrtve i preporuke za održive modele finansiranja, uključujući korištenje oduzete imovine.

Kako bi se osiguralo višerazinsko institucionalno vlasništvo, u saradnji s koordinatorima i timovima za borbu protiv trgovine ljudima, održano je **šest konsultativnih i validacijskih sastanaka** na državnom, entitetskom i nivou Distrikta, uz učešće **70 predstavnika relevantnih institucija**.

Kao rezultat konsultacija postignut je **konsenzus o prijedlogu usaglašenog mehanizma kompenzacije**, primjenjivog u svim jurisdikcijama u Bosni i Hercegovini, u potpunosti usklađenog sa standardima Vijeća Evrope i važećim nacionalnim zakonodavstvom, čime su postavljeni temelji za sistemsku i održivu zaštitu prava žrtava trgovine ljudima.



Studijska posjeta Nizozemskoj – pristup pravdi i kompenzacija žrtava trgovine ljudima

Od 6. do 9. oktobra 2025. godine, 12 pravnih profesionalaca iz Bosne i Hercegovine, uključujući pružaoce besplatne pravne pomoći i predstavnike nevladinih organizacija, učestvovalo je u studijskoj posjeti Hagu i Amsterdamu u okviru projekta Vijeća Evrope uz podršku Ministarstva sigurnosti BiH.

Tokom posjete, učesnici su se upoznali s nizozemskim modelima pravne pomoći i kompenzacije za žrtve trgovine ljudima, s posebnim fokusom na koordinirane sisteme podrške, međuinstitucionalnu saradnju i efektivne pravne lijekove. Ova aktivnost doprinijela je jačanju profesionalnih kapaciteta i prenosu međunarodnih dobrih praksi u Bosni i Hercegovini, osiguravajući funkcionalan i „victim-centred“ okvir zaštite žrtava.



Podrška preživjelim žrtvama trgovine ljudima kroz direktni grant Vijeća Evrope

U periodu od 14. aprila do 15. novembra 2025. godine, Vijeće Evrope je kroz direktni grant podržalo Udruženje „Novi početak“ u realizaciji projekta „Jačanje pristupa pravdi i djelotvornim pravnim lijekovima za žrtve trgovine ljudima“, s posebnim fokusom na žrtve trgovine ljudima iz slučaja SerbAz.

Kroz 19 kolektivnih, ciljanih i terenskih aktivnosti realiziranih širom Bosne i Hercegovine, projekat je obuhvatio 75 osoba sa preživljenim iskustvom trgovine ljudima i relevantnih aktera, pružajući podršku u prikupljanju lične i pravne dokumentacije, pravnom informisanju, podizanju svijesti o radnoj eksploataciji te jačanju međusobne podrške među preživjelim.

Zahvaljujući aktivnostima projekta, potrebna dokumentacija uspješno je prikupljena u oko 75% predmeta obuhvaćenih presudom Evropskog suda za ljudska prava, dok su preostali predmeti u podmakloj fazi rješavanja. Projekat je doprinio jačanju uloge preživjelih u procesima ostvarivanja prava i unapređenju saradnje između civilnog društva i relevantnih institucija.



UDRUŽENJE „NOVI POČETAK“
Novi Početak 2146
78410 Nova Topola
novipocetak2011@yahoo.com
+387 65 911 285
440333560008

JAČANJE PROAKTIVNE IDENTIFIKACIJE I KOORDINACIJE MOBILNIH IDENTIFIKACIJSKIH TIMOVA

World Vision BiH je organizovao radionicu za članove multisektorskih mobilnih identifikacijskih timova koji djeluju u 11 općina/gradova u BiH (Banja Luka, Bijeljina, Bihać, Bosanska Krupa, Cazin, Mostar, Sarajevo, Tuzla, Visoko, Zvornik i Živinice). Kako bi osigurali da proaktivan pristup i rad na terenu mobilnih timova bude efikasan u cilju prevencije i ranog prepoznavanja žrtava trgovine ljudima i djece koja se zatiču u prosjačenju i drugim oblicima iskorištavanja, na radionici su timovi podijelili svoje rezultate za tekuću godinu, ali i izazove sa kojima se suočavaju u svom radu i pristupu usmjerenom na potencijalnu žrtvu. Uz konstruktivnu diskusiju i podršku moderatorice, članice tima za borbu protiv trgovine ljudima Tuzlanskog kantona i Udruženja „Zemlja djece u BiH“, radionica je rezultirala mapiranjem izazova i mogućim rješenjima za njihovo prevazilaženje kako bi rad mobilnih timova i podrška potencijalnim žrtvama bila djelotvornija. Radionica je organizovana u novembru u okviru projekta „Jačanje proaktivne identifikacije, mentalnog zdravlja i psihosocijalne podrške za prevenciju i borbu protiv krijumčarenja i trgovine ljudima u BiH (i regionu)“, finansiranog kao dio GIZ regionalnog projekta EU4FAST.



REGIONALNO MAPIRANJE USLUGA SKLONIŠTA ZA ŽRTVE TRGOVINE LJUDIMA

U okviru regionalnog projekta „Sigurno utočište: Proširenje resursa skloništa za žrtve trgovine ljudima na Zapadnom Balkanu“, finansiranog od U.S. Department of State, World Vision BiH je pokrenuo regionalno istraživanje s namjerom mapiranja da li postojeće usluge skloništa osiguravaju dugotrajnu, kvalitetnu i održivu podršku žrtvama trgovine ljudima. Studija donosi nalaze u kojoj mjeri su usluge smještaja dostupne, integrisane u sisteme usmjerene na žrtvu i uvezane s efikasnim mehanizmima upućivanja na lokalnom i državnom nivou. Također, donosi nalaze o održivosti modela finansiranja, prepoznajući da se dugoročna održivost ne može oslanjati isključivo na doprinose donatora, već mora uključivati predvidljivo i dugoročno finansiranje iz nacionalnih izvora. Istraživanje je obuhvatilo pet projektnih zemalja: Albaniju, Bosnu i Hercegovinu, Crnu Goru, Sjevernu Makedoniju i Srbiju, uz podršku lokalnih partnera Fondacija Lara (BiH), Mary Ward Loreto (Albanija), Udruženje Atina (Srbija) i Otvorena vrata / La Strada (Sjeverna Makedonija).

Rezultate ovog istraživanja World Vision BiH je predstavio kroz organizaciju online regionalne prezentacije koja je okupila 58 predstavnika nadležnih institucija, lokalnih i međunarodnih organizacija regiona. Studija je dostupna na E-resursnom centru Ministarstva sigurnosti BiH.



SPECIJALIZOVANA OBUKA ZA PRUŽAOCE USLUGA ŽRTVAMA TRGOVINE LJUDIMA

U okviru regionalnog projekta „Sigurno utočište: Proširenje resursa skloništa za žrtve trgovine ljudima na Zapadnom Balkanu“, finansiranog od U.S. Department of State, World Vision BiH i projektni partner Fondacija Lara, podržali su i organizovali dvodnevnu specijalizovanu obuku namjenjenu jačanju kapaciteta za rad sa žrtvama trgovine ljudima, u Bijeljini, u decembru 2025. godine, sa fokusom na psihosocijalnu podršku i rad sa traumom, kojih su prisustvovala **23** profesionalca iz sigurnih kuća, centara za socijalni rad i organizacija civilnog društva. Obuka je bila usmjerena na razumijevanje kompleksne i razvojne traume, njenih neurobioloških osnova i manifestacija u ponašanju žrtava, kao i na primjenu trauma-informisanog pristupa u praksi. Poseban akcenat stavljen je na stvaranje sigurnog okruženja u radu sa žrtvama, prevenciju retraumatizacije te specifičnosti rada sa djecom i adolescentima. Kroz praktične vježbe, studije slučaja i razmjenu iskustava, učesnici su unaprijedili vještine prepoznavanja potreba žrtava i primjene konkretnih intervencija u svakodnevnom radu.



Redovni koordinacijski sastanci lokalnih koordinatora za borbu protiv trgovine ljudima

Međunarodna organizacija za migracije (IOM) BiH je organizovala dva redovna koordinacijska sastanka lokalnih koordinatora za borbu protiv trgovine ljudima. Fokus sastanaka bio je na pregledu trenutne situacije, tekućih i planiranih aktivnosti koordinacijskih timova, s posebnim osvrtom na novu Strategiju suprotstavljanja trgovini ljudima u BiH (2024–2027), izradu lokalnih akcionih planova, kao i preporuke iz TIP izvještaja za 2025. godinu.

Oktobarskom sastanku pridružili su se i predstavnici nevladinih i međunarodnih organizacija aktivnih u oblasti borbe protiv trgovine ljudima, s ciljem jačanja koordinacije i efikasnije implementacije budućih projektnih aktivnosti.



Uvodna obuka o trgovini ljudima

IOM je, 9. jula 2025. godine, održao bazičnu obuku za 20 profesionalaca s prve linije borbe protiv trgovine ljudima (14 muškaraca i 6 žena). Obuka je bila usmjerena na unapređenje znanja o indikatorima trgovine ljudima, procedurama rane identifikacije, relevantnom pravnom okviru, kao i razlikovanju trgovine ljudima i krijumčarenja migranata.

Kroz predavanja stručnjaka, analizu studija slučaja i praktične vježbe zasnovane na scenarijima, učesnici su osnažili teorijska i praktična znanja. Evaluacija obuke pokazala je da je 88% učesnika unaprijedilo svoje osnovno razumijevanje ove teme.

Ljetna policijska škola – Brčko distrikt BiH

Zajedno sa drugim međunarodnim i domaćim partnerima, IOM je, u saradnji sa Policijom Brčko distrikta BiH, tradicionalno podržao organizaciju 11. Ljetne policijske škole, s ciljem podizanja svijesti o trgovini ljudima među mladima.

Ukupno 57 učenika srednjih škola i studenata (23 mladića i 34 djevojke) informisano je o rizicima trgovine ljudima i dostupnim mehanizmima prijavljivanja, u saradnji sa lokalnim koordinatom za borbu protiv trgovine ljudima, čime je dodatno ojačana prevencija i rano prepoznavanje ovog krivičnog djela.




Akademija radnih migracija i simulacijska obuka za borbu protiv trgovine ljudima

Pravni fakultet Univerziteta u Zenici i IOM potpisali su Memorandum o razumijevanju, čime je dodatno učvršćena institucionalna saradnja u oblasti obrazovanja o trgovini ljudima i upravljanju migracijama. Na toj osnovi razvijena je i realizovana „Akademija radnih migracija i simulacijska obuka za borbu protiv trgovine ljudima“.

U obuci su učestvovala 23 studenta (14 žena i 9 muškaraca) s pravnih, političkih i filozofskih fakulteta iz Banje Luke, Bihaća, Mostara, Sarajeva, Tuzle i Zenice. Program je obuhvatio teorijske osnove radnih migracija, dinamiku trgovine ljudima, pravni okvir i prava migranata, uz interaktivne studije slučaja i simulaciju sudskog postupka.

Uz mentorsku podršku iskusnih praktičara iz policije, tužilaštva i pravosuđa, studenti su stekli neposredno iskustvo u procesuiranju slučajeva trgovine ljudima, primjenjujući pristup usmjeren na zaštitu žrtava. Evaluacije su istakle simulaciju suđenja i mentorski rad kao ključne vrijednosti obuke.



Simulacija suđenja („mock trial“)

Međunarodna organizacija za migracije, u partnerstvu sa Misijom OSCE-a u BiH i centrima za edukaciju sudija i tužilaca Federacije BiH i Republike Srpske organizirala je [dvodnevnu obuku u obliku simuliranog suđenja](#) 16. i 17. septembra 2025. godine. Obuka je bila usmjerena na pravne aspekte pristanka u slučajevima trgovine ljudima i primjenu pristupa usmjerenog na žrtve. Tokom obuke, sudije, tužioc i policijski službenici (12 žena i 14 muškaraca) učestvovali su u realističnim sudskim scenarijima, što je potaknulo kritičko razmišljanje o pitanju pristanka u kontekstu trgovine ljudima u svrhu radne eksploatacije. Ovaj praktični pristup ojačao je primjenu zakona u praksi, unaprijedio odgovornost počinitelja te dodatno naglasio važnost zaštite prava žrtava.



Digitalna kampanja podizanja svijesti: „By Us, For Us: Stories That Move“

Uz podršku Ministarstva pravde Švedske, IOM je sproveo digitalnu kampanju sa ciljem podizanja svijesti o rizicima trgovine ljudima i promocije regularnih puteva migracije. Kampanja je bila usmjerena na potencijalne migrante iz zemalja porijekla, kao i stanovništvo BiH koje razmatra emigraciju.

Kroz društvene mreže IOM-a BiH, kampanja je promovisala empatiju, kolektivnu odgovornost i informisano donošenje odluka o migraciji, koristeći

pristupačne i edukativne sadržaje zasnovane na stvarnim migracijskim iskustvima. Ostvareni rezultati znatno su premašili planirani domet, sa više od 8,5 miliona impresija, 7,3 miliona pregleda i dosegnutih 3,2 miliona korisnika na Meta i YouTube platformama.



Izrada priručnika „Identifikacija žrtava trgovine ljudima u migrantskim tokovima – Priručnik za policijske službenike“

Tokom 2025. godine izrađen je priručnik namijenjen policijskim službenicima, u cilju jačanja njihovih kapaciteta za identifikaciju i adekvatnu zaštitu potencijalnih žrtava trgovine ljudima u migrantskim tokovima. Priručnik su pripremili stručnjaci iz ove oblasti uz podršku IOM-a, kao odgovor na potrebe identifikovane tokom niza obuka za terenski kadar.

S obzirom na ključnu ulogu policije u ranoj identifikaciji, priručnik predstavlja važan alat za unapređenje institucionalnog odgovora i zaštite ranjivih kategorija.



Migracijski informativni punktovi

Od decembra 2025. godine, IOM je uspostavio migracijske informativne punktove u Bosni i Hercegovini, s fizičkim lokacijama u Sarajevu i Unsko-sanskom kantonu, kao i putem online platforme. Ovi punktovi pružaju pouzdane informacije i prilagođenu podršku različitim kategorijama korisnika, uključujući radnike migrante, migrante u neregularnim situacijama, međunarodne studente, povratnike iz dijaspore i lokalno stanovništvo koje razmatra migraciju.

Usluge obuhvataju savjetovanje o nacionalnom zakonodavstvu, pravima i obavezama, kulturnu orijentaciju, podršku integraciji, kao i upućivanje na nadležne institucije i specijalizirane usluge.

„Jačanje pristupa pravdi i efikasnim pravnim lijekovima za žrtve trgovine ljudima“

U okviru projekta „Jačanje pristupa pravdi i efikasnim pravnim lijekovima za žrtve trgovine ljudima“, koji se provodi uz podršku Vijeća Europe, realizovana je kampanja informisanja i podizanja svijesti o rizicima trgovine ljudima putem interneta. Kampanja je bila usmjerena na savremene oblike online vrbovanja, lažne oglase za posao, grooming, sextortion i druge oblike digitalne manipulacije te je obuhvatila djecu i mlade u riziku, roditelje, prosvjetne radnike, profesionalce i širu javnost u Bosni i Hercegovini.



U okviru kampanje obilježen je **30. juli – Svjetski dan borbe protiv trgovine ljudima**, kroz aktivnosti posvećene informisanju građana o oblicima trgovine ljudima u digitalnom prostoru, kao i dostupnim mehanizmima prijave i podrške.

Povodom **18. oktobra – Evropskog dana borbe protiv trgovine ljudima, MFS-EMMAUS je, u saradnji s Ministarstvom sigurnosti Bosne i Hercegovine i uz podršku Vijeća Europe, organizovao panel diskusiju „Digitalne zamke: Prevencija trgovine ljudima počinje znanjem“**, koja je okupila predstavnike institucija, policijskih struktura, stručnjake i mlade, s ciljem jačanja međusektorskog dijaloga o savremenim oblicima trgovine ljudima u digitalnom okruženju.

Dodatno, u okviru kampanje izrađen je i distribuiran **informativni poster**, kao i realizovana **četiri podcasta „Digitalne zamke“**, posvećena temama trgovine ljudima u digitalnom okruženju, ulozi institucija i značaju prevencije i psihološke podrške, čime je dodatno osnažen sveobuhvatan preventivni pristup u borbi protiv trgovine ljudima u Bosni i Hercegovini.

Aktivnosti Centra za sigurni internet u Bosni i Hercegovini

Centar za sigurni internet u Bosni i Hercegovini, kojim rukovodi Međunarodni forum solidarnosti – EMMAUS, nastavio je, u periodu od **jula do decembra 2025. godine**, djelovati na zaštitu djece i mladih u digitalnom okruženju kroz online kampanje, javne informativne aktivnosti i preventivne poruke usmjerene ka djeci, roditeljima, obrazovnim radnicima i široj javnosti.

U navedenom periodu pored edukativnih aktivnosti realizovano je više **kampanja usmjerenih na prepoznavanje digitalnih rizika**, s posebnim naglaskom na činjenicu da se **trgovina ljudima sve češće odvija upravo putem interneta**.

Posebno je istaknuta **ljetna kampanja** usmjerena na zaštitu djece, s fokusom na rizike neželjenog fotografisanja, dijeljenja sadržaja s plaža i bazena te dugoročnih posljedica objavljivanja fotografija djece na internetu. Kampanja je naglašavala važnost zaštite privatnosti djece i odgovornog ponašanja odraslih, uz jasnu poruku da djeca nisu online sadržaj.

Kroz ove aktivnosti, Centar za sigurni internet nastavio je doprinositi jačanju svijesti o povezanosti digitalne sigurnosti i trgovine ljudima

te osnaživanju djece i mladih da prepoznaju rizične situacije, potraže pomoć i zaštite se u online okruženju.

Besplatna SOS linija za savjete i podršku: 0800 22 323

Anonimna prijava neprimjerenog sadržaja, nasilja u digitalnom okruženju ili drugih oblika nasilja, kao i trgovine ljudima je moguća putem web portala www.sigurnodijete.ba

U periodu od jula do decembra 2025. godine, realizovane online i offline kampanje ostvarile su značajan komunikacijski učinak. Kroz kombinaciju kampanja, preventivne poruke imale su **ukupnu vidljivost od preko 700.000 pregleda i prikaza**, čime je dodatno ojačana prepoznatljivost i doprinos borbi protiv digitalnih rizika, uključujući i trgovinu ljudima.



Policijske operacije u BiH uz podršku projekta EU4FAST

Dvije policijske operacije sprovedene u Bosni i Hercegovini ilustruju kako koordinisani napori doprinose razbijanju organizovanog kriminala i jačanju regionalne sigurnosti. Obje su realizovane uz podršku regionalnog projekta **EU4FAST**, usmjerenog na borbu protiv trgovine ljudima i krijumčarenja migranata na Zapadnom Balkanu.

Opipljivi rezultati ovih aktivnosti – desetine uhapšenih osumnjičenih, prekinute rute trgovine ljudima i osigurani novi istražni tragovi – pokazuju mjerljiv napredak u borbi protiv trgovine ljudima i krijumčarenja migranata. Još važnije, oni potvrđuju kako strateška podrška EU može direktno dovesti do operativnog uspjeha i sigurnijeg okruženja za zajednice širom Bosne i Hercegovine.

Operacija „NID“ – Borba protiv trgovine ljudima u Sarajevu, Istočnom Sarajevu i Zavidovićima

Državna agencija za istrage i zaštitu (SIPA) je **12. novembra 2025. godine** u ranim jutarnjim satima izvršila pretres stambenih objekata na području Sarajeva, Istočnog Sarajeva i Zavidovića.

Operacija je bila usmjerena na osobe osumnjičene za učešće u organizovanom kriminalu, međunarodnoj trgovini ljudima i pranju novca. Pretresi su izvršeni na osnovu sudskih naloga i u koordinaciji između SIPA-e i ministarstava unutrašnjih poslova Republike Srpske, Kantona Sarajevo i Zeničko-dobojskog kantona.

Operacija „ISTOK SWAT“ – Razbijanje migrantskih kriminalnih mreža u Velikoj Kladaši

Krajem oktobra 2025. godine, u općini Velika Kladaša, Ministarstvo unutrašnjih poslova Unsko-sanskog kantona, u saradnji s više drugih policijskih agencija i pod nadzorom Kantonalnog tužilaštva, provelo je veliku akciju pod kodnim nazivom „ISTOKSWAT“.

Meta su bile organizovane kriminalne grupe sastavljene od migranata afganistanskog porijekla, za koje se navodi da su bile uključene u teška krivična djela, uključujući otmice, iznude, krijumčarenje ljudi i druge oblike organizovanog kriminala. U paralelnoj prekograničnoj operaciji uspostavljena je saradnja i s policijom Republike Hrvatske u susjednom pograničnom području Sisačko-moslavačke županije.

Složenost ovih operacija naglašava povezanost migracijskih tokova, organizovanog kriminala i granične sigurnosti – pitanja s direktnim implikacijama na upravljanje, strana ulaganja, humanitarnu zaštitu i regionalnu stabilnost. Svaka operacija potvrđuje unaprijedene institucionalne kapacitete, jačanje vladavine prava i poboljšanu saradnju između jurisdikcija – ključne elemente za izgradnju sigurnijeg regiona.



Održano 18. godišnje Stručno savjetovanje tužilaca u Neumu, BiH

Godišnje stručno savjetovanje tužilaca u Bosni i Hercegovini održano je od **14. do 17. oktobra 2025. godine** u Neumu. Događaj je okupio više od 120 tužilaca, pravnih stručnjaka i predstavnika međunarodnih organizacija s ciljem razmatranja konkretnih mjera za unapređenje krivičnog gonjenja u predmetima trgovine ljudima i jačanje zaštite žrtava.

Konferenciju je organizovalo **Udruženje tužilaca Federacije Bosne i Hercegovine**, uz kontinuiranu podršku projekta Vijeća Evrope za borbu protiv trgovine ljudima, kao i značajan doprinos projekta **EU4FAST** i **Misije OSCE-a u BiH**. Sedmu godinu zaredom, ovo partnerstvo osiguralo je fokus događaja na rezultate i stvarni učinak u borbi protiv trgovine ljudima.

Ovogodišnje savjetovanje uključivalo je panel o **pristupu pravdi i efikasnim pravnim lijekovima za žrtve trgovine ljudima**, uz podršku projekta EU4FAST, u saradnji s drugim partnerima. Panel je bio izuzetno produktivan i informativan, nudeći vrijedne uvide u način na koji tužioci postupaju u predmetima trgovine ljudima te naglašavajući važnost pristupa usmjerenog na žrtvu i utemeljenog na razumijevanju traume. Diskusije su također obuhvatile mehanizme upućivanja, pristup pravdi i međuinstitucionalnu saradnju – sve ključne elemente za osiguranje adekvatne zaštite i podrške žrtvama.

Tužioci, predstavnici vlasti i stručnjaci iz organizacija civilnog društva podijelili su praktična iskustva i razmotrili načine za povećanje efikasnosti finansijskih istraga, osiguranje naknade štete za žrtve i pravovremenu identifikaciju i zaštitu žrtava trgovine ljudima.

Kao rezultat diskusija, učesnici su usvojili set zaključaka i preporuka usmjerenih na jačanje međuinstitucionalne koordinacije, standardizaciju procesa identifikacije žrtava i proširenje pristupa pravdi i pravnim lijekovima za žrtve trgovine ljudima i srodnih krivičnih djela.

Kontinuirani angažman projekta EU4FAST doprinio je konkretnom napretku u usklađivanju tužilačkih praksi i praksi zaštite žrtava u Bosni i Hercegovini s evropskim standardima, jačajući nacionalne kapacitete za efikasnije pružanje pravde i sigurnosti.



Regionalna konferencija protiv prisilnog prosjačenja i trgovine ljudima

Borba protiv prisilnog dječijeg prosjačenja i trgovine ljudima daje rezultate kroz snažniju saradnju, bolju koordinaciju i konkretne zajedničke aktivnosti širom Zapadnog Balkana. U okviru projekta EU4FAST, Regionalna konferencija o prisilnom dječijem prosjačenju i trgovini ljudima okupila je policijske službenike, tužioce, predstavnike institucija za borbu protiv trgovine ljudima, nevladinih organizacija, Europola, EMPACT-a i međunarodne partnere s ciljem da se zajednička odgovornost pretoči u opipljiv napredak. Konferencija je održana u Tirani (AL) 28. oktobra, uz sudjelovanje regionalnih aktera.

Učesnici su unaprijedili dijalog o zaštiti djece, istragama slučajeva, mehanizmima upućivanja i regionalnoj koordinaciji te se složili da, iako postoje čvrsti zakonski okviri, rezultati zavise od efikasne saradnje i međusobnog povjerenja. Konferencija je ponovo potvrdila kolektivnu odlučnost da se djeca zaštite od eksploatacije, pretvarajući partnerstvo u mjerljiv učinak.



Sastanak Radne grupe Zapadni Balkan (Task Force Western Balkans)

Nedavni sastanak **Radne grupe Zapadni Balkan** u Tirani unaprijedio je regionalnu saradnju i postavio jasne prioritete za zajedničko djelovanje protiv prekograničnog kriminala. Dvodnevni sastanak (održan 14. i 15. oktobra) okupio je ključne predstavnike institucija Zapadnog Balkana, država članica EU, Turske, Ujedinjenog Kraljevstva i EU agencija, uključujući **Europol**, **Frontex**, **INTERPOL** i **EMPACT koordinatora**, kako bi se odgovorilo na hitne prekogranične sigurnosne izazove.

Domaćin sastanka bila je **Državna policija Albanije**, a zajednički su ga organizovali projekat **EU4FAST** i **Austrijska kriminalističko-obavještajna služba (Savezno ministarstvo unutrašnjih poslova)**. Diskusije su bile usmjerene na:

- unapređenje **EMPACT operativnih akcionih planova (OAP) za period 2026–2027**,
- jačanje razmjene obavještajnih podataka u realnom vremenu,
- unapređenje operativne koordinacije u borbi protiv krijumčarenja migranata i organizovanog kriminala.

Neritan Nallbati, načelnik Odjela kriminalističke policije Državne policije Albanije, potvrdio je spremnost Albanije da preuzme vodeću operativnu ulogu u aktivnostima Radne grupe Zapadni Balkan. Naglasio je da pravovremena razmjena informacija i međunarodna koordinacija ostaju ključni faktori za razbijanje kriminalnih mreža koje djeluju preko granica.

Ključni rezultati uključuju:

- dogovor o prioritetskim operativnim oblastima za 2026. godinu,
- posvećenost pokretanju zajedničkih akcija početkom 2026. godine,
- jačanje mehanizama za prekograničnu razmjenu podataka i regionalnu koordinaciju.

Sastanak predstavlja konkretan iskorak ka usklađivanju regionalnih napora i osiguravanju da partnerstva rezultiraju efikasnim djelovanjem na terenu.



Udruženje Vaša prava BiH je pružalo sveobuhvatnu besplatnu pravnu pomoć i savjetovanje usmjereno na zaštitu migrantima, tražiocima azila, izbjeglicama i žrtvama trgovine ljudima u potrebi za zaštitom, na više lokacija, uključujući privremene prihvatne centre (Ušivak, Lipa, Borići i Blažuj) te granična područja. Aktivnosti su bile usmjerene na ranu identifikaciju rizika od trgovine ljudima, pravno savjetovanje o postupcima azila i boravka, individualno vođenje slučajeva te pravno zastupanje u složenim i visokorizičnim predmetima. Kroz individualna savjetovanja, aktivnosti podizanja svijesti i pravne intervencije, Udruženje je pružilo podršku korisnicima u snalaženju kroz administrativne i sudske postupke, osiguravajući poštovanje njihovih prava i jačajući saradnju s relevantnim institucijama. Posebna vrijednost njihovog rada ogleda se u dugogodišnjem iskustvu u radu na složenim slučajevima i bliskoj saradnji sa sudskim i administrativnim organima, što doprinosi jačanju povjerenja između korisnika i institucija.

World Vision se fokusirao na jačanje mehanizama proaktivne identifikacije i zaštite, posebno kroz podršku i operativno djelovanje mobilnih identifikacijskih timova (MIT) te pružanje usluga mentalnog zdravlja i psihosocijalne podrške (MHPSS) u privremenim prihvatnim centrima (Borići, Blažuj, Ušivak). Intervencije su bile usmjerene na jačanje saradnje s lokalnim institucijama i službama socijalne zaštite, unapređenje rane identifikacije djece u riziku te jačanje mehanizama upućivanja i zaštitnih odgovora na nivou zajednice. Angažman World Visiona bio je posebno značajan u povezivanju preventivnih aktivnosti sa širim sistemima zaštite djece, osiguravajući da odgovori na rizike od trgovine ljudima budu integrirani u postojeće sisteme socijalne zaštite i podrške zajednici.

Centar za razvoj omladinskog aktivizma (CROA) provodio je preventivne aktivnosti usmjerene na

cyber trgovinu ljudima i online eksploataciju, s posebnim fokusom na djecu, porodice i prosvjetne radnike. U periodu od juna do decembra 2025. godine, CROA je realizirala osam obuka za roditelje, deset školskih sesija podizanja svijesti za učenike te sedam obuka usmjerenih na jačanje kapaciteta pedagoga. Ove aktivnosti su doprinijele jačanju digitalne pismenosti, ranom prepoznavanju rizika i zaštitnim kapacitetima unutar škola i porodica, ističući ključnu ulogu obrazovnog sistema u prevenciji rizika povezanih s trgovinom ljudima u online okruženju. Kako bi se osigurala održivost nakon završetka treninga, CROA je također osigurala priručnike namijenjene nastavnicima, učenicima i roditeljima, čime su dodatno ojačani dugoročni preventivni napori.

18. OKTOBAR - EVROPSKI DAN BORBE PROTIV TRGOVINE LJUDIMA

Udruženje „Novi put“ je, u saradnji s Koordinacionim timom Vlade Hercegovačko-neretvanskog kantona (HNK) za borbu protiv trgovine ljudima, a uz podršku Fondacije Thomson Reuters, obilježilo 18. oktobar - Evropski dan borbe protiv trgovine ljudima medijskom i javnom kampanjom podizanja svijesti i informisanja šire javnosti. U periodu od jula do decembra 2025. godine, Udruženje „Novi put“ je uz podršku fondacije Thomson Reuters realizovalo 6 uličnih kampanja podizanja svijesti o najnovijim oblicima trgovine ljudima, metodama vrbovanja te načinima prevencije. Tokom ovih kampanja podijeljeno je oko 1100 informativnih materijala za oko 2000 predstavnika šire javnosti u Hercegovačko-neretvanskom i Zapadnohercegovačkom kantonu. Kampanje su također realizovane u romskim zajednicama. Djeci i roditeljima u romskim naseljima su pružene i informacije o mogućnostima zaštite djece od prisilnog prosjačenja, radne eksploatacije, dječijih prisilnih brakova i svih ostalih mogućih vidova iskorištavanja djece u lancu trgovine ljudima.




KAMPANJA PODIZANJA SVIJESTI

Uz podršku Vijeća Evrope, Udruženje „Novi put“ je, u periodu od jula do decembra 2025. godine, u HNK i ZHK realizovalo 25 kampanja podizanja svijesti s fokusom na seksualno i online nasilje. Pored uličnih kampanja, Udruženje „Novi put“ je putem svojih društvenih mreža provodilo online kampanje podizanja svijesti o rizicima trgovine ljudima i prevenciju trgovine ljudima i nasilja u digitalnom okruženju.



ŠKOLSKE RADIONICE U ZHK I HNK

Uz podršku Vijeća Evrope, Udruženje „Novi put“ je održalo osam interaktivnih školskih radionica u ZHK i HNK za 182 učenika i učenica osnovnih i srednjih škola, s ciljem jačanja njihove svijesti o seksualnom i online nasilju, prijavljivanje sumnjivih aktivnosti te sigurnosti na internetu.



PSIHOLOŠKA I SOCIJALNA POMOĆ DJECI ŽRTVAMA

Udruženje „Novi put“ je, uz podršku UNHCHR-a, tokom izvještajnog perioda kontinuirano pružalo direktnu psihološku i socijalnu pomoć djeci žrtvama svih oblika modernog ropstva te radilo na njihovom osnaživanju, a uz podršku Diplomatskog zimskog bazara, Udruženje „Novi put“ je radilo na pružanju individualne i grupne psiho-socijalne podrške djeci koja su preživjela ili su bili u riziku od raznih oblika iskorištavanja.



OBUKE ZA IZGRADNJU KAPACITETA PREDSTAVNIKA NADLEŽNIH INSTITUCIJA IZ HNK I ZHK


Udruženje „Novi put“ je, uz podršku Vijeća Evrope, tokom 2025. godine organizovalo tri obuke za izgradnju kapaciteta predstavnika nadležnih institucija iz HNK i ZHK (ministarstava unutarnjih poslova; ministarstava pravosuđa, ministarstava obrazovanja, ministarstava socijalne skrbi, centara za socijalni rad, škola, policijskih uprava, općinskih sudova i kantonalnih tužiteljstava), i nevladinih organizacija za postupanje u slučajevima seksualnog i online nasilja te okrugli sto za predstavnike nadležnih institucija i organizacija, na kojem su definirane preporuke za unapređenje međuinstitucionalne suradnje i upućivanja u slučajevima seksualnog i online nasilja.



MISIJA OSCE-a U BOSNI I HERCEGOVINI

Sažet prikaz sudske prakse u slučajevima trgovine ljudima

Kako bi se unaprijedili kapaciteti pravosuđa za prepoznavanje elemenata krivičnog djela trgovine ljudima i unaprijedio odgovor sistema krivičnog pravosuđa na trgovinu ljudima, Misija OSCE-a u Bosni i Hercegovini (Misija) je podržala izradu [Sažetog prikaza sudske prakse u slučajevima trgovine ljudima](#). Publikacija sadrži odabrane dijelove presuda izrečenih u BiH, a u nedostatku domaće sudske prakse za određene aspekte uključuje i relevantne primjere presuda iz drugih jurisdikcija.



Simulirano suđenje za studente prava

Misija je, u saradnji s Visokim sudskim i tužilačkim vijećem BiH (VSTV BiH) i međunarodnim partnerima podržala dvije obuke za studente prava u 2025. godini. Od 8. do 10. oktobra 2025. godine, Četvrto državno [takmičenje u simuliranom suđenju](#) održano je u Mostaru. Prepoznajući važnost obrazovanja budućih pravnih stručnjaka, takmičenje u simuliranom suđenju na Sveučilištu u Mostaru okupilo je 24 studenta prava (20 žena i 4 muškarca), njihove mentore s pravnih fakulteta u Zenici, Sarajevu, Tuzli, Bihaću i Mostaru te 11 profesionalaca koji su učestvovali kao sudije u panelu. Studenti su simulirali sudski postupak u predmetu zasnovanom na sudskoj praksi Evropskog suda za ljudska prava.



Panel diskusija na Godišnjem savjetovanju tužilaca

Misija je također dala doprinos održavanju Godišnjeg savjetovanju tužilaca, koji je održan u Neumu od 14. do 17. oktobra 2025. godine, pružajući podršku – zajedno s međunarodnim i domaćim partnerima – [panel](#) diskusiji o procesuiranju predmeta trgovine ljudima.




Omogućavanje međunarodne saradnje

Uz podršku Misije, predstavnik BiH sudjelovao je na zajedničkom sastanku OSCE-a i Vijeća Evrope za državne koordinate za borbu protiv trgovine ljudima i izvjestitelje, održanom u Strazburu u Francuskoj 11. i 12. septembra 2025. godine. Sastanak je bio fokusiran na ulogu privatnog sektora u prevenciji trgovine ljudima, uključujući odgovorne lance nabave, saradnju s transportnim i digitalnim sektorima, pripremljenost za krizne situacije u nacionalnim akcionim planovima te povezanost između trgovine ljudima, droge i prisilnog kriminala. Kroz svoju podršku, Misija je omogućila aktivno sudjelovanje BiH i značajnu razmjenu dobrih praksi na međunarodnom nivou.

Kampanja na društvenim mrežama povodom Svjetskog dana borbe protiv trgovine ljudima

Povodom Svjetskog dana borbe protiv trgovine ljudima, Misija je 30. jula 2025. godine provela kampanju na društvenim mrežama.



Konferencija za podizanje svijesti i jačanje borbe protiv trgovine ljudima i radne eksploatacije u lancima snabdijevanja

Povodom Evropskog dana borbe protiv trgovine ljudima, Misija je, u saradnji s OSR/CTHB 18. oktobra 2025. godine, organizirala [konferenciju](#) u Sarajevu s ciljem podizanja svijesti i jačanja borbe protiv trgovine ljudima. Konferencija je okupila predstavnike privatnog sektora, inspekcije rada, policije, civilnog društva, međunarodnih organizacija i diplomatske zajednice, naglašavajući zajedničku odgovornost i potrebu za koordiniranim radom radi primjene pristupa dužne pažnje temeljenog na ljudskim pravima te sprečavanja trgovine ljudima i radne eksploatacije u lancima snabdijevanja.



MISIJA OSCE U BIH: REZULTATI PRAĆENJA PREDMETA TRGOVINE LJUDIMA

Misija OSCE-a u BiH prati predmete trgovine ljudima i srodne predmete s ciljem identifikovanja najboljih praksi i nedostataka u odgovoru pravosudnog sistema na trgovinu ljudima. U periodu između 1. januara i 31. decembra 2025. godine, Misija je pratila 31 predmet koji se odnose na krivična djela pravno kvalifikovana kao trgovina ljudima u skladu sa važećim zakonodavnim okvirom u BiH ili, bez obzira na njihovu pravnu kvalifikaciju, predmete u kojima su bitne činjenice ukazivale na postojanje zakonski propisanih elemenata krivičnog djela trgovine ljudima.



Od ukupnog broja praćenih predmeta, 28 predmeta je još u toku, a 3 predmeta su okončana u periodu između 1. januara i 31. decembra 2025. godine.



Praćeni predmeti uključivali su 52 optuženih (43 muškaraca i 9 žena). Kao što je prikazano u grafikonu ispod, praćeni predmeti odnose se na krivično djelo trgovine ljudima u skladu s članom 186. Krivičnog zakona BiH (KZ BiH) u 6 predmeta; krivično djelo trgovine ljudima iz člana 210a KZ FBiH u 5 predmeta i 1 predmet iz člana 210b KZ FBiH; i krivično djelo trgovine ljudima iz člana 207a KZ BDBiH u 4 predmeta.



U 3 praćena predmeta sudske odluke se odnose na krivično djelo međunarodno navođenje na prostituciju iz člana 187. KZ BiH; u 3 predmeta sudske odluke se odnose na krivično djelo navođenje na prostituciju iz člana 210. KZ FBiH.

U 5 predmeta prijave se odnose na krivično djelo zapuštanje ili zlostavljanje djeteta (KZ FBiH, čl. 219 - 3 predmeta, KZ RS, čl. 207 - 1 predmet, KZ BDBiH čl. 216 - 1 predmet).

U 4 predmeta prijave se odnose na krivično djelo spolnog odnosa sa djetetom (KZ FBiH, čl. 207 - 2 predmeta, KZ RS, čl. 172 - 1 predmet, KZ BDBiH čl. 207d - 1 predmet).

U 4 predmeta prijave se odnose na krivično djelo iskorištavanje djeteta radi pornografije (KZ FBiH, čl. 211 - 1 predmet, KZ RS, čl. 175 - 2 predmeta, KZ BDBiH čl. 207i - 1 predmet).

Ostale optužbe u praćenim predmetima uključivale su krivična djela kao što su zadovoljenje pohote pred djetetom ili maloljetnikom (KZ FBiH čl. 209 - 2 predmeta); otmica djeteta ili maloljetnika (KZ FBiH čl. 217 - 1 predmet); protivpravno lišenje slobode (KZ FBiH čl. 179 - 1 predmet); silovanje (KZ FBiH čl. 203 - 1 predmet); bludne radnje (KZ FBiH čl. 208 - 1 predmet, KZ BDBiH čl. 205 - 1 predmet); nasilje u porodici (KZ BDBiH čl. 218 - 1 predmet).

Sljedeći grafikon detaljno opisuje krivična djela u predmetima koji su okončani u izvještajnom periodu (1. januar - 31. decembar 2025. godine):



Tokom izvještajnog perioda, ukupno 117 žrtava je identifikovano u praćenim slučajevima trgovine ljudima, uključujući 21 muškarca i 96 žena. Među njima, 83 žrtve bile su izložene krivičnim djelima vezanim za rod. Što se tiče nacionalne pripadnosti, 79 žrtava su bili Bošnjaci, 18 Srbi, 17 je pripadalo drugim etničkim grupama, dok etnička pripadnost za 3 žrtve nije poznata. Po pitanju državljanstva, 84 su državljani Bosne i Hercegovine, 13 Srbije, 1 Afganistana, a za 19 žrtava državljanstvo nije poznato.



Tokom izvještajnog perioda, u jednom pravosnažno okončanom predmetu u kojem je bio podnesen imovinskopravni zahtjev, sud je oštećenu stranku uputio na parnični postupak. U predmetima koji su još u toku podnesena su dodatna tri zahtjeva za naknadu štete; o jednom je odlučeno u prvostepenom postupku tako što je oštećena stranka upućena na parnični postupak, dok o preostala dva zahtjeva još nije odlučeno jer je prvostepeni krivični postupak i dalje u toku pred sudom.

U jednom predmetu u izvještajnom periodu (1. januar - 31. decembar 2025. godine) četiri su optužena oglašeni krivim te osuđeni na kazne zatvora. Najniža izrečena kazna je dvije godine zatvora, a najviša 15 godina zatvora.

U praćenim predmetima zabilježena su dva zahtjeva tužilaštva za oduzimanje nezakonito stečene imovinske koristi. Međutim, kako u predmetima koji su presuđeni tokom izvještajnog perioda, tako i u onima koji su još u toku, nije zabilježena nijedna sudska odluka o oduzimanju nezakonito stečene imovine.







DRŽAVNI KOORDINATOR ZA BORBU PROTIV TRGOVINE LJUDIMA I ILEGALNE MIGRACIJE U BIH

Ministarstvo sigurnosti BiH
Trg BiH
71000 Sarajevo
Bosna i Hercegovina

Tel.: +387 33 492 455
+387 33 492 452
+387 33 492 420
+387 33 710 530
Fax: +387 33 710 531
e-mail@ureddk@msb.gov.ba

osce Organization for Security and
Co-operation in Europe
Mission to Bosnia and Herzegovina

Misija OSCE-a u BiH je podržala izradu ovog materijala.
Svako gledište, izjava ili mišljenje, izraženo u ovoj publikaciji, a za koje nije izričito naznačeno da potiče iz Misije OSCE-a u BiH,
ne odražava nužno zvaničnu politiku Misije OSCE-a u BiH.